



partii naleraq

Nuuk, 10. marts 2015

UPA2015/74

Imaanut aqqartartutut suliaqarneq aqqartartullu atortui il.il. pillugit inatsisip allannguutai pillugit inatsisip Kalaallit Nunaannut atortuulersinneqarnissaanik kunngip peqqussutaa pillugu Kalaallit Nunaanni Namminersorlutik Oqartussat oqaaseqaataat pillugu Inatsisartut aalajangiinissaat.

(Ineqarnermut, Sanaartornermut Attaveqaqatigiinnermullu Naalakkersuisoq)

UPA2015/75

Ilisimasortat pillugit inatsisip ilaata Kalaallit Nunaannut atortuulersinneqarnissaanik kunngip peqqussutaa pillugu Kalaallit Nunaanni Namminersorlutik Oqartussat oqaaseqaataat pillugu Inatsisartut aalajangiinissaat.

(Ineqarnermut, Sanaartornermut Attaveqaqatigiinnermullu Naalakkersuisoq)

UPA2015/76

Imarsiornerup isumannaatsuunissaa pillugu inatsisip allannguutaat pillugit inatsisip Kalaallit Nunaannut atortuulersinneqarnissaanik kunngip peqqussutaa pillugu Kalaallit Nunaanni Namminersorlutik Oqartussat oqaaseqaataat pillugu Inatsisartut aalajangiinissaat.

(Ineqarnermut, Sanaartornermut Attaveqaqatigiinnermullu Naalakkersuisoq)

Imaanut aqqartartutut suliaqarneq aqqartartullu atortui il.il. pillugit inatsisip allannguutai pillugit inatsisip Kalaallit Nunaannut atortuulersinneqarnissaanik kunngip peqqussutaa pillugu Kalaallit Nunatsinni Namminersorlutik Oqartussat oqaaseqaatissaat Partii Naleqqamiit imaattumik oqaaseqarfigissuarput.

Aallaqqaasiullugu Partii Naleqqamiit inatsisartunut naalakkersuisunullu kaammattuutigissuarput, inatsiseqarnikkut nunap ingerlanneqarnera pissutsinut piviusunut qaninnerusumik aaqqiissuteqarfigineqarnissaa danskit naalakkersuisuinut oqaloqatigiissutigineqartariaqartoq, tassami nunasiaateqarnerup nalaanitut kunngip peqqussutaasigut nunami maani aqutsinerup ilaa pissusissamisoortutut isiginnginnatsigu.

2009-mi Namminersorneq atuutilerpoq amma qularutiginnilarput nunarput nammineerneruleriartortoq, taamaattumik Kunngip Peqqussutaasigut, danmarkimi ministeri kinaagaluartorluunniit siunissami maani Naalakkersuisugut qulaatiinnarlugit malittarisassiorsinnaanera taamaattussaannartut isigissanerippat Partii Naleqqamiit apeqquuserparput.

Tassami suliami uani Kunngip Peqqussutissaani pingasuni, danmarkimi inuussutissarsiornermut ineriartornermullu ministeri maani nunatsinni imaatigut isumannaallisaanermut tunngasut pillugit malittarisassiorsinnaassasoq siunnersuutini ataasiarani allaqqavoq.

Partii Naleqqamiit tulluarnepaatut pissusissamisoornerpaatullu isigaarput, aaliangersakkani ministerip qulaani taaneqartup maani nunatsinni inuussutissarsiornermut Naalakkersuisoq pissutsit taamaakkallartillugit pinsinnaatissagaa pisariaqassappat malittarisassiorsinnaassasoq, taamaassinnaangippat danmarkimi ministerip nunatsinnilu Naalakkersuisup suleqatigiillutik malittarisassaliornissamut tunngasut suliarisariaqaraat Partii Naleqqamiit isumaqarpugut.

Tassami suut tamarmik nutaanngoriartornerannut malinnaasariaqarpugut, pissusitoqqat allaat Kunngip peqqussuteqartarnerinut tunngasut nutartertariaqalersut Partii Naleqqamiit isumaqarpugut.

Nunasiaateqarneq qaangiutereernikuuvoq tamatta qineqqusaarnitsinni nutarterinissarput allannguinnissavut eqqartorpavut.

Taamaattumik Partii Naleqqamiit Inatsisartunut Ilaasortat Naalakkersuisullu tamaasa matumuuna kaammattorpavut pissusitoqqanik allannguiniarnitsinnut peqataaqqullugit.

Inuussutissarsiorsinnaanermik inatsisip allannguutaanik inatsimmi nr. 364 majip 13-ianni 2009-meersumi § 19, imm. 2, il.il. peqqussutissamut siunnersuutip § 1-iani oqaaseq una "suliaqarnerneq" iluarsisariaqarpoq.

Taavalu Peqqussutissatut siunnersuutit tamarmik 1. Juli 2014-imi atuutilersussanngortinneqarsimanerat allanngortinneqartariaqassooq immaqa 1. Juli 2015-imut?

Peqqussutissatut siunnersuummi § 2 inatsimmi nr. 618, 12. Juni 2013-imeersumi imarsiornermik inatsit aamma inatsisit allat assigiinngitsut tunngavigalugit imaani aqqartartut pillugit Siunnersuisoqatigiit atorunnaarsinneqarnerat Kalaallit Nunatsinnut qanoq sunniuteqassua?

Imaanut aqqartartut pillugit peqqussutissami aalajangersakkat Nunatsinnut pissutsinut naleqqussarneqarsimanerat qujanaraluartoq, taamaattoq taakkununnga tunngasut allakkiatigut takussutissartaqanngillat aamma suliani immikkoortoq 74-imi 76-imilu inatsisit allannguutaat pingaartutut oqaatigineqartut allakkat inuussutissarsiornermut ineriartortitsinerimullu ministerimit 27. Februar 2013-imi saqqummiunneqarsimasut innersuussutigineqartut siunnersuutini ilaanngillat, immaqa nalilersuinitinnut pingaaruteqaruttortut?

Issitup imartaani imarsiornermi isumannaallisaaneq eqqarsaatigalugu umiarsuarni ilisimasortaqartarnermut tunngasut akuerisaasut atorneqartarnissaasa piumasaaqaataasarnissaat Naalakkersuisut saqqummiussinermini oqaatigaat.

Taakkununnga tunngatillugu Partii Naleqqamiit paaserusupparput Kalaallit Nunatta imartaani assersuutigalugu takornariartaassuit nunatta eqqaani angalasarnerminni ilisimasortanit nunatsinneersunik atuisarnersut?

Ilisimasortanit ilinniartitsineq ingerlanneqarppaa?

Aamma ilisimasortaqaartussaannermik piumasagaatit piviusunnortinneqarnissaat eqqarsaatigalugu Naalakkersuisut qanoq pilersaaruteqarnersut paasissallugit pingaaruteqarpoq.

Aamma tusarniaasimanermi ilaatigut Visit Greenland-ip apeqquisiisimanagera innersuussutigalugu.

Ilisimasortat pillugit inatsisip ilaata Kalaallit Nunatsinnut atortuulersinneqarnissaanik Peqqussutissatut siunnersuut tupinnaannartumik amerlasuunik naqinnerluinernik kukkunertaqarpoq, taakkulu soorunami suliap naammassineqannginnerani iluarsineqarnissaat Partii Naleqqamiit kaammattuutigaarput. Kiisalu siunnersuutip kalaallisuuani kalaallisut oqaatsitta aamma tamakkiisumik atornerqarnissaat piumasagaatigaarput, soorlu oqaaseqatigiit imaattut:

“Erhvervs- aamma vækstministeri”.

Kiisalu imarsiornerup isumannaatsuunissaa pillugu inatsisinik allannguiniarnermut tunngatillugu Partii Naleqqamiit siunertarinqartoq isumaqatigaarput, tassa umiarsuit ilaasartaatit ingerlaartarfissanik aalajangersimasunik pilersitsinikkut sukaterinerit nalunaarutigut aalajangersarneqartalerinissaat aamma sikulimmi angalanissamut umiarsuit qajannaallisagaanissaannik piumasagaarneq pissusisamisoorluinnarput.

Tassunga ilanngullugu Partii Naleqqamiit isumaqarpugut umiarsuit aamma 250-it inorlugit ilaasoqarsinnaasut piumasagaatinut qulaani taaneqartunut atuuttariaqartut.

Naggataatigut Partii Naleqqamiit assut aamma soqutigaarput umiarsuit takornariartaatit nunatta eqqaani angalanerminni pinngortitamut avatangiisinillu mingutsitsinerat qanoq atsiginersoq ilisimaneqarnersoq imaluunniit pinngortitamik avatangiisinillu mingutsitsinaveersarneq siunertaralugu Naalakkersuisut qanoq iliuuseqarnersut?

Taamatut Partii Naleraq sinnerlugu oqaaseqarlunga suliap aappassaanererneqannginnerani inatsiseqarnermut ataatsimiititaliami suliarineqarnissaa inassutigaa.

Anthon Frederiksen